

Èsi bun d'avair in palantschin u èsi plitost in dischavantatg? – D'ina vart sun jau fitg leda da noss palantschin per deponer u metter or dals pes chaussas che n'avessan betg il lieu ideal en tschaler.




La rumida gronda

Da l'autra vart pudessi forsa esser ch'ins magasinescha chaussas ch'ins na dovra mai pli. Ins na sa gea mai... Er en noss tschaler sa rimnan dapli chaussas che necessari. Jau hai dentant constatà gia pliras giadas che jau sai bittar davent bler meglier las chaussas da mes um e da mias figlias, che las atgnas. Quai n'è betg gist fair. En sasez stuessan els bittar davent mias chaussas e jau poss dir tge che jau rumiss dad els. La quintessenza è però che chaussas che nagin n'ha guardà il davos mez onn vegnan puspè interessantischmas ed a la fin na svanescha nagut ord chasa! In auter sistem raffinà da sa deliberrar da chaussas ha sviluppà mes bab cun far midada da la chasa en in'abitaziun. Mintga visita dumandava el: «Pudesas ti duvrrar quai?» E mintgin pudeva pir ir, sch'el aveva tscherni insatge. (Stgisa paps che jau tradesch quai!)

Jau na sai era betg adina bittar davent bain las chaussas. Sche jau hai però in bun di e m'hai pudì distatgar da chaussas nunnecessarias ha quai dà in sentiment da libertad, da ligerezza e da sa deliberar da ballast – e quai en in senn dubel. Perquai hai jau anc gugent talas «attatgas» da rumida. Guardar, cura che la proxima vegn...

Cun salids cordials



Karin Kohler-Pattis